



# LABI NGA ISULONG ANG MGA KADALAG-AN SANG 50 KA TUIG SANG PARTIDO KOMUNISTA SANG PILIPINAS

Taas kamao nga nagahinugyaw kag ginasinggig sang tanan nga rebolusyonaryo nga pwera upod sa Partido Komunista ng Pilipinas sa Panay ang pagsaulog sang bulawanon nga anibersaryo sang aton dungganon nga Partido!

Tama lang nga magkalipay ang bug-os nga rebolusyonaryo nga pwera sa Panay bangod sang mga pinasahi nga mga kadalag-an nga naagom sang Partido sa bug-os nga pungsod kag subong man sa rehiyon sa sulod sang 50 ka tuig.

Ginpundar ang Partido sa rehiyon sa teorya sang Marxismo-Leninismo-Maoismo. Ginahimo ini paagi sa sistematiko nga edukasyon sa 3-ka lebel nga kurso sang Partido para sa tanan nga katapuan, mga pagtuon sang mga basehan nga dokumento kag mga ubay halin sa Konggreso sang Partido, Komite Sentral kag iban pa nga mataas nga organo kag mga sinulatan mismo sang dungganon nga mga Komunista. Wala ini ginapabilin nga tinun-an lamang kundi nangin giya kag inspirasyon sa aktwal nga rebolusyonaryo nga praktika nga ginsubuhan sang balhas, dugo kag kabuhi sang tunay nga mga proletaryong rebolusyonaryo.

Sa pagsaludar sang aton bulawanon nga kaadlawan, aton man ginasaludar ang indi malipatan nga kaisog kag binuhatan sang aton mga rebolusyonaryong baganihan kag martir nga nagapalambo sang aton rebolusyonaryo nga banas kag nagapaisog sa aton nga magpadayon tubtob kadalag-an. Yara gid sila sa aton luyo sa aton pagselebrar.

Sa malawig nga tinuig ginpursigir sang Partido sa Panay ang rebolusyonaryo nga paghimakas sandig sa teorya kag linya sang pangmalawigan nga inaway banwa kag sa

estrategiya sang pagpalibot sang syudad halin sa kaumhan. Nagsulong ang armado nga paghimakas sa rehiyon paagi sa paglunsar sang gerilya nga pagpakig-away nga nasandig sa nagalapad kag nagadalom nga baseng masa.

Sandig sa pungsudnon nga panawagan sang pagpalapad sang inaway gerilya sa bug-os nga kapuluan, gin-umpisahan ang pagpundar sang rebolusyonaryo nga paghimakas sa Panay sang pila ka kadre sang Partido kag madamo nga aktibistang masa nga kalabanan halin sa kubay sang kabataan-estudyante. Kadam-an sang mga kadre kag aktibista produkto sang bugso sang unang kwarto sang 1970 ukon "first quarter storm" sang 1970. Madasig kag mapagsik ang pagdaku, paglapad kag pagbuylo sang hayag nga kahublagan sa mga syudad kag kabanwahanan sa Panay labi sa kubay sang pamatan-on kag estudyante sa mga kolehiyo, unibersidad, seminaryo, mga komunidad kag pati sa sektor sang mga manunudlo, abugado, kag simbahan. Madamo man nga mga lokal nga negosyante kag iban nga propesyunal ang nagasimpatiya sa mga isyu nga dala sang mga pamatan-on-estudyante labi ang pagpamatok sa pagtaas sang presyo sang langis, balaklunon, balayran sa tuition kag pagkilala sang mga kinamatarong sang mga estudyante sa eskwelahan (academic freedom).

Ginsuguran naton ang inaway gerilya sa isla sang 1971 paagi sa pila ka SI (social investigation) tim sang mga kadre sang Partido sa mga daan nga myembro sang HMB (Hukbong ng Bayan) sa banwa sang Calinog, Iloilo nga sanday Ka Andres Togonon, ang iya asawa nga si Coronacion Chiva nga mas kilala bilang Kumander Waling-waling kag iban pa nga mga katapo sang daan nga Partido kag HMB. Sikreto kag tago ang pagtungod sang imbestigasyon sosyal kag kontak-bilding sa kaumhan sang Calinog kag sa Tapaz, Cuartero kag Dao sang Capiz nga may pagtutok sa binukid sang Calinog kag Tapaz.

Madasig nga naglapta ang inaway gerilya sa Panay sang madamo nga kadre kag pangmasa nga aktibista ang nagpabukid sang gulpe nga ginpapanaog ang layi militar sa bilog nga pungsod sang 1972 sang pasistang diktador Marcos. Sila ang nagbukas sang armado nga paghimakas sa lain-lain nga bahin sang isla – sa Iloilo, Capiz kag Aklan. Nagpabukid ining mga pamatan-on nga halos wala inagihan sa ginatawag nga gyera ukon inaway, bitbit ang pila ka bilog lang nga mataas-kalibre nga armas, mas madamo ang pugakhang, malip-ot nga mga armas kag pila lang ka panid



sang mga panapton. Pero kargado sila sang diwa, inspirasyon kag ubay sang MLM nga umpisahan ang pangmalawigan nga inaway banwa sa isla.

Ang una nga tinuig sang 14 ka tuig nga layi militar, partikular ang tinuig 73-78 puno sang panghangkat sa panindugan, kaisog kag pagtilaw sang una nga mga rebolusyonaryo nga lamharon sa edad, bag-o sa teorya kag eksperyensya sa pagrebolusyon labi sa aktwal nga inaway sa regular nga tropa sang estado.

Madamo nga mga kadre asta sa rehiyunal nga lebel ang napatay sa aktwal nga inaway, nadakpan kag gintortyur. May mga platoon kag iskwad sang NPA nga nawipe-out. Ang bag-ong pundar nga baseng masa wala man nakaluwas sa kapintas sang kaaway. Sa tuyo nga “kutlon ang bukol”, nagsabwag sang puti nga kakugmat kag terorismo ang mga bayaran nga tropa ni Marcos kag sang iya PC (Phil. Constabulary) Heneral Fidel Ramos kag Chief of Staff sang AFP nga si Heneral Fabian Ver.

## **Matapos ang isa ka dekada sang 1981 nalab-ot naton ang panugod nga pagpusisyon sa mga estratehiko nga lugar nakatundan sang Panay.**

Wala kaluoy ang pangdakop, tortyur, pagpatay sang mga pasista nga tropa sa mga kadre kag katapo sang Partido sa lokalidad kag mga ordinaryo nga pumuluyo. Ginhimo nila nga ‘no man’s land’ ang binukid sang Tapaz kon sa diin ginatiro ang sin-o man nga makita bisan bata pa, asta sa pagpugot sang ulo, lukit sang mata, utod sang kinatawo, lubong nga buhi pa kag panglugos kag pangbastos sa mga kababainhan. Amo man ini ang naagyan sang baseng masa naton sa bahin sang Aklan labi sa Ibajay kag Madalag.

Sa pihak sini, sa baylo nga malupog ang rebolusyon nagdaku ang NPA sa Panay, naglapad ang mga lugar nga ginahulagan kag naglig-on ang baseng masa. Ini man ang panahon nga makahas nga nagpalapad ang mga tim kag iskwad nga umpisa naghulag sa pilang bilog lang nga mga banwa sang Capiz, Aklan kag Iloilo tubtob nga nagdamo ang mga banwa nga ginahulagan.

Matapos ang isa ka dekada, sang 1981 nalab-ot naton ang panugod nga pagpusisyon sa mga estratehiko nga lugar sa nakatundan sang Panay. May tatlo ka prenteng gerilya nga nagasakop sang dulunan sang Aklan-Antique, dulunan sang Iloilo-Capiz-Aklan, kag sa nabagatnan nga bahin sang Iloilo. Ang amo nga mga prenteng gerilya wala pa nagatambihanay. Nahulagan ang mas o menos 27 ka banwa nga kadam-an sa binukid

kag intermedya nga bahin, kag may pila ka ekspansyon sa haywey kag kilid-baybay. May mga 200 ka pultaymer sa kaumhan nga ang daku nga mayorya ara sa mga iskwad sang armado nga yunit pangpropaganda (AYP) nga nagatungod sang hilikuton pangmasa kag hilikuton militar. Sobra 700 ang mga katapuan sang Partido sa kaumhan kag kasyudaran.

Halin sa nakatundan sang Panay nagpalapad kita sa nasidlangan nga bahin. Nagdamo ang mga tim kag gagmay nga iskwad sang mga AYP asta sa lubos-iskwad nga pormasyon. Nakapadamo kita sang armas paagi sa paggamit sang taktikal nga superyoridad batok sa maluya nga bahin sang kaaway kag pag-uyat sang elemento sang sorpresa kag inisyatiba. Ginbatuan naton ang mga kampanya kag operasyon sang kaaway paagi sa paglikaw sa ila dalagku kag makusog nga pwersa kag ginabira ang ila nahamulag kag mahuyang nga bahin para sa aktibo nga depensa. Katuwang sini ang padayon nga pag-angot kag pagsalig sa suportang masa sa panahon sang atake.

Grupo pang-organisa (GP) ang kabilugan nga lebel sang mga organisasyong masa kag may pila ka komite pang-organisa (KP) kag sanga sang Partido sa konsolidado nga mga lugar. Minimum nga demanda ang kabilugan nga lebel sang rebolusyong agraryo bisan pa man nga may pila ka kumpiskasyon sang kasapatan kag abandonado nga lupa sang pila ka dalagku nga agalon may duta sa nabukid nga bahin sang mga prenteng gerilya. Ang lebel sang mga taktikal nga opensiba, kontra sa tim-kadaku nga mga para-militar kag pulis. Ginatungdan sang dungan ang hilikuton pangmasa kag mga taktikal nga opensiba sang mga AYP. Sa ulihi nga bahin may mga prente nga nagporma sang komposit nga platun halin sa mga AYP para sa pana-panahon nga pagbira sang mas dalagko kaysa tim nga target. Ang ini nga komposit nga pwersa nagatipon kon mag-TO kag naga-bungkag kon nagatungod sang hilikuton pangmasa.

Makasiling kita nga maayo nga nalatag ang pundasyon sang inaway gerilya sa nakatundan sang Panay bisan pa man nga may mga taladlungon sa pila ka bahin, pareho sang mahinay nga pag-organisa sa masa, pagkaulih sang kontrapyudal nga mga paghimakas kag 'wala' ukon sala nga pagbira sa suspetsado nga mga impormer.

Ang kabilugan nga ubay sa hilikuton pulitikal sa kaumhan kag amo man sa kasyudaran amo ang resulta sang pagsuma sang pungsudnon nga pamunuan sang una nga bahin sang dekada 70 nga nahamtang sa dokumento nga "Ang Mahigpit Nating Mga Tungkulin" (OUT).

Sa sentrong urban, halin sa mapiot nga kahimtangan sang gulpi nga pagdeklarar sang layi militar, nakabawi kita paagi sa pagpusisyon liwat sa mga sektor kag komunidad kag

panugod nga pangmasa nga aksyon nga kontrapasista ang kinaiya. Padayon ang pagpasaka sang pwera kag kadre halin sa syudad pakadto sa kaumhan.

Ang daku nga bahin sang dekada 80 nanging panahon sang bugso kontra sa US-Marcos nga diktadurya. Diri nakaangkon ang Partido kag rebolusyonaryo nga kahublagaan sa Panay sang wala tupong nga mga kadalag-an kag pag-abanse sa halos tanan nga patag sang hilikuton. Nagdaku sang pila ka pulo ka libo ang organisado nga masa sa kaumhan kag linibo ang kabilugan nga numero sang pulang hangaway, organisador kag pultaym nga pwera. Natukod ang duha ka kompanya sang NPA nga may tig 80-90 ang personel. Naglapad ang napolisyonan nga lugar halin sa kaumhan asta sa mga sentro nga banwa. Naglunsar sang mga aksyon militar ang NPA halin sa bukid tubtob sa kapatagan kag sentrong banwa. Naghulag ang linibo nga masang mangunguma kag naggwa sa dalanon sang mga sentro nga banwa asta sa kasyudaran agud sa

pagpamatok sa pasismo, militarisasyon sa kaumhan kag para sa pagdemanda sang matuod-tuod nga reporma sa duta.

Mabaskog kag masyado kasangkad sang impluwensya sang rebolusyonaryo nga kahublagaan sa isla.

Sa una nga tinuig sang dekada, mapagsik kag malaparan ang kampanya sa pagtuon sang BKP asta sa mga basehan nga yunit sang Partido sa bilog nga rehiyon. May nadebelopar nga mga instruktur sa mga lokalidad mismo. Ang BKP ang

nagserbe nga teoritikal nga pundasyon sang katapuan sang Partido. May mga kurso man nga nagdugang sa teorya kag oryentasyon sang katapuan pareho sang IPO course, Consol Cadre Course kag sang ulihi nga tinuig, ang Intermedya nga Kurso.

Sang 1986 nahulagan ang 78 ka banwa ukon 80% sang kabanwahanan sang Panay kag mga 50% sang kabilugan nga mga baryo sang rehiyon. Ang organisado nga masa sa tago nagdaku sa 67,000. Napataas ang kabilugan nga lebel sang mga organisasyong masa sa KP lebel kag madamo man ang mga baryo nga Pambansang Katipunan ng mga Magbubukid (PKM) tsapter lebel na. May pila ka breytru sa pagtukod sang PKM munisipal nga lebel. Madamo ang naorganisa nga masang mangunguma, mga kababainhan kag mga pamatan-on. Wala man napabayaang pagtukod sang mga lokal milisya halin sa iskwad tubtob platun-kadaku. Sa mga konsolidado nga baryo 60%-70% sang populasyon ang organisado. Mayorya sini nahamtang sa binukid kag



intermedya nga bahin, kag may mga sanga sang Partido. Ang bug-os nga katapuan sang Partido sa rehiyon naglab-ot sa mga 4,300 samtang ang kadre mga 1,500.

Ang nalab-ot nga pinakadaku nga pangmasang mobilisasyon antes mabagsak ang US-Marcos nga diktadurya amo ang 30,000-35,000 sa syudad sang Iloilo nga mas o menos 80% halin sa kaumhan. Nakaabot man sa 80,000 ang pinakamataas nga mobilisasyon sa sentrong urban kag mga kapitolyo nga ang 60% sini halin sa kaumhan.

Sa pihak nga bahin, ang nalab-ot nga mga pagdaku, paglapad kag pagbaskog may karga kag impluwensya sang disoryentasyon sang SCO (strategic counter-offensive). Ang SCO nanawagan sang pagporma sang madamo nga mga kumpanya asta batalyon, pagpataas sang lebel sang gerilya nga inaway pakadto sa regular nga mahulag nga inaway kag pagpasingki sang gyera. Ang mga hilikuton kag katuyuan nga gintalana tuman ka lapaw sa obhetibo nga lebel kag aktwal nga kapasidad sang rebolusyonaryo nga pwersa. Nagbunga ini sang gindihon nga pol-mil nga estratehiya sang Una nga Rehiyunal nga Kumperensya sang 1986. Sa sulod sang aton pag-abanse nagkomiter kita sang dalagku nga mga paglihis, kasaypanan kag kakulangan nga nagpaatras sang aton mga ganar kag nagbunga sang dalagku nga mga kapyerdihan.

---

## **Ang adbenturismo militar sang linya nga SCO kag estratehiya nga pol-mil ang nagdulot sang pinakagrabe nga kahalitan kag kapyerdihan sa aton hilikuton sa kaumhan kag sa armado nga pagpanikasog sa kabilugan.**

Nagbunga sang panugod nga mga ganar dala sang tama nga linya pero bangud sang pagsamo sang tama kag sala nga linya wala ini nasustener sang nagpanagil-ot ang mga disoryentasyon kag mga paglihis. Ang dogmatismo sa porma sang sobra nga pagtantya sang lebel kag ikasarang sang rebolusyonaryo nga pwersa kag pakagamay sa kaaway ang ugat sang mga 'wala' nga oportunistang mga polisiya.

Ang adbenturismo militar sang linya nga SCO kag estratehiya nga pol-mil ang nagdulot sang pinakagrabe nga kahalitan kag kapyerdihan sa aton hilikuton sa kaumhan kag sa armado nga pagpanikasog sa kabilugan. Gintuhay ang makinarya para sa hilikuton militar kag para sa hilikuton pangmasa. Gulpi nga ginbatak ang pormasyon sang hangaway sa platun kag kumpanya nga bulag na sa hilikuton pangmasa. Ginbilin sa

mga SLT (semi-legal team) nga indi armado ukon naarmasan lang sang maluya nga hinganiban ang hilikuton sa baseng masa kag rebolusyong agraryo.

Nagkonsentrar ang mga dalagku nga pormasyon sang NPA sa pagbira sa mga istasyon sang pulis sa munisipyo kag mga detachment sa sulod sang mga sona kag baseng gerilya. Sa umpisa madamo ang mga daug sang NPA pero sang nagtaas man ang balos-reaksyon sang kaaway paagi sa batalyon-kadaku nga mga operasyon, pangbomba, kanyon, pagpaikit kag pagreimpors sang ila mga detachment, malaparan nga pagtukod sang cafgu, asta paghamlet sang pumuluyo sa sentro sang mga baryo – nangin tuman ka bulnerable ang aton baseng masa, mga SLT kag mismo ang hangaway. Lima ka regular nga batalyon sang Phil Army ang gintutok sa 3 ka larangang gerilya sa Central, Norte kag Sur sa idalom sang ‘total war policy’ sang US-Cory Aquino nga rehimen.

Halin sa solido kag halintang sa halintang nga pag-organisa nga gina-updan sang edukasyon masa, naghuyog sa pasilhig kag buhaghag nga pag-organisa nga mas nagtutok na sa pagpahulag sa masa pa-syudad sa impluwensya sang insureksyunismo. Maikit ang pagdulhog sang masa sa mga sentrong banwa asta syudad para sa pag-rali kontra pasismo kag diktadurya pero malaka na ang mga pagtuon pangmasa kag pangPartido.

May pila ka kontra-pyudal nga mga kampanya pareho sang pag-okupar sang lupa sang mangunguma sa Barangay Bungsuang, Dumarao, Capiiz, pagpataas sang presyo sang paray sa Tapaz, pagpataas presyo sang kopra sa Ibajay pero sa kabilugan gagmayan, pugtak-pugtak kag malaka ang mga hulag para sa pang-ekonomiya nga interes sang masa.

Ang pagkabuhaghag sang mga organisasyon masa kag pagpabaya sa paglunsar sang rebolusyong agraryo mga paktor man sa bulnerabilidad sang baseng masa sa mga atake sang kaaway.


Halin ulihi nga binulan sang 1987 asta bilog nga dekada sang 1990 nangin tayuyon ang aton pag-usmod. Ang una nga tinuig sang dekada 90 nangin pinakamasalimuot nga panahon sa kasaysayan sang Partido sa Panay.

Nagtaksanay sang kusog ang tama kag sala nga linya sa sulod sang Partido sang magpanawagan ang ika-10 nga plenum sang Komite Sentral sang 1992 sang ikaduha nga kahublagan sa pagpanadlong sang bilog nga Partido batok sa ‘wala’ nga oportunidad sang ‘regularisasyon’, adbenturismo militar sa kaumhan kag insureksyunismo sa urban.

Ginpamatukan ang pagpanadlong sang pila ka katapo mismo sang Komite Sentral, sang bilog nga Visayas Commission nga amo ang naga-ubay sa mga rehiyon sa Visayas kag nahabig nila ang bilog nga Komiteng Rehiyon (KR) sang Negros kag katunga sang KR sang Panay.

Sa Panay nahabig sang mga rebisyunistang traidor, 'rejectionista' (nagpamatok sang Panadlong) kag paksyonalista ang bilog nga komite sang prente sa Sur kag hangaway sini (maluwas sa isa ka seksyon komite kag pila ka AYP), ang mayorya sang katapuan sang komite sang prente sa Norte kag hangaway sini, ang mayorya sang hangaway sang MRGU (main regional guerrilla unit) kag pila ka kadre sa urban.

Ang mga kadre sa Central Front kag Eastern Front (eastern Panay) nagpaabot sang pagtindog para sa pagpanadlong sang KS pero nadala man sang lokal nga



paksyunalismo sa porma sang indi pagkilala sang sentro sang liderato (KTKR) sang rehiyon.

Ang duha ka mayor nga organo sa urban nanindugan para sa pagpanadlong maluwas sa pila ka elemento nga nagtindog para sa 'rejection'.

Agod mahaylo ang mga kaupod sa ila linya, naggamit ang mga rejectionista sang intriga batok sa pungsudnon kag rehiyunal nga pamunuan kag mga kadre nga nagtindog sa panadlong. Ginganyat ang kaupod paagi sa maabtik nga paghatag kwarta, kagamitan, suplay, kag regalo sa mga indibidwal. Ginsakyan man ang personal-pyudal-burgis nga relasyon mag-asawa, paryente, best friends, maninoy, kag iban pa.

Ginpadayon sang mga lagawan nga armado nga pwersa sang mga rebisyunista ang adbenturista nga mga birada nga pati sibilyan nadalahig, kag ang gangsterismo sa



porma sang panghold-ap pati bangko kag pagpangawat sang kagamitan sa ila mga operasyon. Ginbansagan nila ang ila guban nga RPA (revolutionary proletarian army). Sila ang responsable sa pagbira sa isa ka yunit sang NPA sa Culasi, Antique sa diin duha ka kaupod ang napatay kag isa ang napilasan kag nadakop.

Sa pihak sang mga intriga kag panghaylo sang mga paksyonalista nga nangin ispesyal na nga mga ahente sang AFP, ginsikway sang mayorya sang katapuan kag kadre sang Partido ang maitom nga linya sang mga traidor. Nagtindog ang Partido sa pagpanadlong, ginbalikan ang mga basehang prinsipyo kag gin-ako ang mga kasaypanan. Nagsuma ang rehiyunal nga pamunuan kag nagbalay sang komprehensibo nga programa agod lubos maugat ang mga kasaypanan, masikway kag matadlong ini sa ideolohiya, pulitika, militar kag organisasyon. Nagtutok ang bug-os nga organisasyon sang Partido kag hangaway sa reoryentasyon, rekoberi kag redispusisyon.

## **Nagtindog ang Partido sa pagpanadlong, ginbalikan ang mga basehang prinsipyo kag gin- ako ang mga kasaypanan.**

Ang resulta sang sala nga linya kag isplitismo, nagbalik kita sa lebel sang 1978-1979 santo sa pusisyuning sa kaumhan kag urban, sa baseng masa, elemento sang Partido, kadre kag pultaym nga pwera.

Sang Hulyo 1994 sa pagsuma sang rehiyon, nagnubo sa 25 ka banwa kag 200 ka baryo ang ginahulagan kag mga 600 ang organisadong masa. Katumbas isa ka kompanya na lang ang nabilin nga hangaway, 1,300 ang katapo sang Partido kag sobra 500 ang mga kadre.

Wala sapayan sang isa ka dekada kag tunga nga pag-atras (halin 1994), ang Partido sa rehiyon wala nalingkang sa pagbangon, pagpanadlong kag liwat nga pagsulong. Ginbalikan naton ang masa nga amo ang pundasyon sang inaway banwa kag liwat gin-uyatan ang mga prinsipyo kag tama nga pamaagi sa solido nga pag-organisa. Labaw sa tanan, gin-ako kag ginsaway sang Partido kag hangaway ang mga kasaypanan, paglihis kag mga kakulangan sa atubang sang masa. Nangin kahublagan ang mapainubuson nga pagsaway kag pagsaway-sa-kaugalingon upod sa masa. Bagay ini nga wala ginhimo sang mga rejectionistang traidor.

Sang 2001 ginhiwat ang ikaduha nga Rehiyunal nga Kumperensya sang Partido. Ginsuma ang aton praktika sa pagpanadlong halin 1994 kag nagpanawagan sa pagpangibabaw sang konserbatismo para sa tanan-nga-bahin nga pagsulong. Halin diri


amat-amat nga nagrehistro sang pagbawi ang rebolusyonaryo nga pwersa bisan may kahinayon pa.

Sa subong nakabawi na kita halin sa pag-atras kag pasulong ang huyog sang rebolusyonaryong hublag sa tanan nga patag. Sa gihapon nakaposisyon kita sa mga estratehiko nga bahin sang nakatungdan sang Panay kag sa nasidlangan, nagdugang sang 50% ang ginahulagan nga mga banwa kag nagdaku sang 125% ang mga baryo nga sakop sang mga prenteng gerilya. Nagapabilin kag mas ginapalig-on ang mga baseng gerilya sa tunga sang mga atake sang kaaway.

Padayon nga nagadaku ang hangaway sang banwa nga mas disiplinado kag muklat sa katungdanan nga magpalapad kag pasinsin sang inaway gerilya sandig sa nagalapad kag nagadalom nga baseng masa. May doble nga pagdaku ang katapuan sang NPA kag platon na ang kinaandan nga pormasyon sang mga yunit kag may tig pila ka iskward nga yunit pangpalapad. Masarangan sang NPA ang pag-ambus sa platon-kadaku nga regular nga tropa kag pag-atake sa mga istasyon sang pulis sa banwa kag mga detatsment sa sulod sang sona.

Nagapadayon nga nagadaku kag nagalapad ang baseng masa kag 37 ka pilo ang pagdaku sang organisado kag baseng masa sa kaumhan. Nalab-ot ang lebel sang lubos nga PKM tsapter sang mga organisasyon sang mangunguma, halin sa wala sang umpisa sang pagpanadlong.

Halin sa mahipos, ginagmay kag masyado kalaka nga paghulag sang mangunguma, nakalunsar sang mga kontrapyudal nga mga paghimakas ang organisadong mangunguma batok sa manug-agaw duta nga mga ahensya sang gobyerno labi na ang Phil Army, kontra sa pagpanghimulos sang mga dalagku nga mga usurero, kag nga mapataas ang presyo sang produkto. Ginatos asta linibo ang pagdemanda ila mga naghulag nga masang mangunguma labi na ang mga tumandok sang Tapaz kag Jamindan sa Capiz kag sang Calinog sa Iloilo batok sa panglanggab sang Phil Army kag batok sa pagtukod sang mga mega-dam sa suba sang Jalaur kag Pan-ay. Nalunsar ang interbaryo nga mga paghulag sang masa sa lain-lain nga mga banwa kontra sa usura kag



para sa pagpataas sang presyo sang ila produkto. Laksa-laksa nga pumuluyo ang nakabenepisyo man paagi sa ila organisado nga pagdemanda sa inutil nga gobyernong Noynoy Aquino kag Duterte sang kompensasyon kag rehabilitasyon halin sa kalamidad sang bagyo Yolanda sang Nobyembre 2013.

Talalupangdon ang liwat nga buylo sang hayag nga hublag masa sa rehiyon nga nagalab-ot sa pulo ka libo ang naghulag sa mga pangmasang protesta kag mga paghulag sa lain-lain nga mga isyu nga nagatuluhaw kag nagasinampaw bangod sang nagasingki nga krisis pang-ekonomiya kag pangpulitika. Ang malapad nga alyansa sang mga drayber kag opereytor makapatawag sang transport istrayk nga makaparalisa sang pangpubliko nga transportasyon sa duha ka adlaw sa bilog nga Panay nga suportado sang publiko mismo. Nagapabilin kag nagapanguna kita sa pinakamilitante nga mga tindog, panawagan kag aksyon sa mga isyu sang pumuluyo. Nagdako ang organisadong pwersa sa hayag kag puti nga lugar sang 38 ka pilo halin sa pila ka libo lang sang 1994, subong man may sobra 5 ka pilo nga pagdaku sang organisado sa tago halin sa pila ka gatos lang.

Ang katapuan kag kadre sang Partido mas madalom nga nasangkapan sang teorya paagi sa 3-ka lebel nga kurso kag iban pa nga mga ispisipiko nga mga oryentasyon kag pagsuma halin sa aton mismo inagihan kag sang iban nga rehiyon. Ginasiguro ang hugot nga pagpamuno sang Partido sa hangaway kag may mga yunit sang Partido nga nagapamuno sa masa sa mga lokalidad, komunidad, mga eskwelahan kag sa lainlain nga mga sektor sang katilingban sa kaumhan kag kasyudaran. Masobra 5 ka pilo ang pagdaku sang katapuan sang Partido kag masobra 3 ka pilo nga pagdaku sang kadre.



Nalampuwasan kag nakaamot kita sa pagpaslaw sang mapintas nga pagpaninguha sang tanan nga nagligad nga reaksyunaryo nga rehimen nga mapaluya kag madugmok ang Partido kag NPA. Nakaupod kita sa pagpatalsik sang pasistang diktaduryang US-Marcos kag korap nga rehimen US-Estrada. Upod man kita subong sa tanan nga rebolusyonaryong pwersa kag pumuluyo sa bilog nga pungsod sa pagbato sa mapintas, uhaw sa dugo kag korap nga tiraniyang US-Duterte.

Sa pagsapraktika sang kritisismo kag pagsaway sa kaugalingon, ara subong ang Partido sa Panay sa proseso sang pagtadlong sang huyog sa konserbatismo paagi sa labi nga pagpadaku sang hangaway, pagpalapad kag pagpasinsin sang mga taktikal nga opensiba, dugang nga pagpalapad kag pagpusisyon sa mga estratehiko nga bahin sang rehiyon, dugang nga pagpadamo sang katapuan kag kadre sang Partido, mas mataas nga lebel sang rebolusyong agraryo kag ang pagpadamol kag pagpabaskog sang tago nga kahublagan sa kasyudaran.

Sa tama nga pagpamuno sang Partido kag suporta sang malapad nga masa, nagapabilin ang rebolusyonaryo nga hublag sa Panay nga malig-on kag mabaskog nga armado nga pwersa batok sa reaksyunaryo nga estado kag sa armado nga kusog sini. Wala kita napulbos, wala kita napyerde, wala kita napanas sa pihak sang tanan nga pagtinguha sang nagligad nga mga reaksyunaryo nga rehimen. Segurado mapaslaw naton ang damgo sang pasista nga rehimen US-Duterte nga papason kita sa 2019.

Sug-alawon naton ang aton ika-50 nga tuig nga mas labaw ang determinasyon sa pag-atubang sang mga masalimuot nga mga panghangkat sang rebolusyon. Ubos-kusog nga pangibabawan ang mga kasaypanan, mga kakulangan kag mga pagtilaw. Magsulong dungan sa rebolusyonaryo nga pwersa sa bug-os nga pungsod pakadto sa abante nga subhalintang sang estratehiko nga dependensiba!

